

Asisko gutuna

2021eko uztaila 1. printzipioa. Eguneroko bilatzea Jainkoarekin harreman pertsonala 153. zenbakia

Asis Sarea eguneroko bizimoduan espiritualtasun frantziskotarra ezagutu edo partekatu nahi duten lagunen sare sozial irekia da.

Hainbat aldetatik aldarrikatzen da espiritualtasunaren garrantzia. Hala ere, otoitza batere agerikoa ez den garaiak bizi ditugu. Gure otoitza berrikusteko unea da, Jainkoarekiko harreman-bide garrantzitsua.

Gogoetarako gaia

Otoitzaren funtsa

Esan ohi dugu otoitza garrantzitsua dela fedea bizitzeko, Jainkoarekiko harreman pertsonalari eusteko. Eta horrela da, benetan. Baina otoitzean urteak daramatzagun arren, ondo datorkigu noizean behin otoitza berari errepasso bat ematea. Gure inguruan fedeari buruz nagusi diren zalantzek, errutinek eta lehortasun-garaiek argaltzera eta ahultzera daramatzate Jainkoaren aurrean otoitz egiteko denbora hartzera bultzatu gintuzten lehen motibazio haiek.

Pablok Colosasko kristauei zuzendutako gutun batean esaten die: "Otoitzean iraun". Horretarako, uste osoa izan behar dugu ez gaudela bakarrik ahalegin horretan. Gure bihotzean xuxurlatzen, inspiratzen, gure alde ari den Izpirituak adoratzeko gaitu. Gugandik sortutako otoitza egitea baino gehiago, agian lagunduko liguke pentsatzea Jainkoaren aurrean jarrita Izpirituari uzten diogula gure baitan esan dezan. Gure bihotzak

barruan daramana hitz egin, esan, askatu dezan onesten dugu. Eta hau guztia Haren aurrean jartzeko dugu. Ez naiz ni otoitzaren, Jainkoarekiko harremanaren iturri, baizik eta Jainkoa bera da gure izate osoa blaitzen duena.

Zein pozgarria den haren presentzia sentitzen dugunean, harreman horretan hitzak eta hitzak ateratzen direnean, edo esandakoaren eta bizitakoaren arteko koherentzia dagoenean. Benetan eskertzekoa da. Hala ere, nire otoitzaren egia ez da gauza horietatik neurtzen, nire bihotzak Jainkoarekiko duen irekitasun mailagatik baizik; sentitu edo ez sentitu, hitzak izan edo ez izan, koherentziaz bizi ala ez. Bere presentziak nire otoitzaren egia egiaztatzen du.

Otoitza, horregatik, fedearen ondorioa ez ezik, fedearen eta harremanean hazteko eskola ere bada; Jainkoaren argitan benetan bizitzen irakasten digu.

Bibliako pasarteak: Er 8,26-28

Era berean, Espiritua datorkigu geure ahulezian lagun, guk ez baitakigu behar bezala otoitz egiten; baina Espirituak berak erregutzen du gure alde esanezin ahalako intziriz. Eta bihotzak aztertzen dituen Jainkoak ezagutzen du zein den Espirituaren gogoia, Espirituak Jainkoaren asmoen erara erregutzen baitu fededunen alde. Badakigu Jainkoak bera maite dutenen onerako bideratzen dituela gauza guztiak, bere aurre-erabakiz deitu dituenen onerako, alegia.

Frantziskotar espiritualtasuna

Eta eskerrak ematen dizkizugu, zeure Semearen bitartez egin gintuzun bezalaxe, bera, egiazko Jainko eta egiazko gizona, izan zenigun maitasun santuaz, Ander Maria beti Birjina ospetsu eta txit doha-tsuagandik jaioarazi zenuelako, eta gu, gatibuok, haren gurutze eta odol eta heriotzaz berrerosi nahi gaituzulako.

Eta eskerrak ematen dizkizugu, zure Seme hau bera bere maiestatzeko aintzaz beterik etorriko delako, bihotz-berritu ez diren eta zu ezagutu ez zaituzten madarikatuak betiko sutara jaurtitzera, eta ezagutu eta adoratu eta bihotz-berriturik zerbitzatu zaituzten guztiei esatera: Zatozte, nire Aitaren bedeinkatuok, hartazue munduaren hasieratik zuentzat prestatua dagoen erreinua.

Eta gu guztiok, errukarri eta bekatariok, ez baikara zu aipatzeko duin, arren erregutzen dugu, Jesu Kristo gure Jaunak, atsegin izan zenuen zeure Seme maiteak, guztiagatik eskerrak eman diezazkizula Espiritu Santu Laguntzailearekin batera, zeuri eta berari atsegin zaizuen bezala: bera aski baituzu beti edozertarako eta beraren bitartez hainbat mesede egin baitzenigun. Aleluia!

(1Er 23,3-5)

Otoitza

Jauna, hobeto ezagutzen nauzu
 nik neure burua ezagutzen dudana baino.
 Zure Espirituak blaitu egiten ditu
 nire bizitzako une guztiak.
 Eskerrik asko nire gainera isurtzen ari zaren
 zure graziagatik eta zure maitasunagatik.
 Eskerrik asko Zu nire bizitzan sartzen uzteko
 egiten didazun zure gonbidapen etengabe eta leunagatik.
 Barkatu zure gonbidapenari uko egin diodan aldiengatik,
 eta zure maitasunetik urrun ibili naizelako.
 Lagundu datorren egun honetan
 zure presentzia nire bizitzan ezagun dezadan,
 Zuri irekia egon nadin.
 Zuk niregan egin dezazula,
 Zure aintzarako.

(Loiolako San Inazio)

Gutuneko azken hitzak

«Otoitzak ez du Jainkoa aldatzen, baina bai otoitzean ari dena». Soren Kierkegaard.

2021eko uztailleko eguneroko Ebanjelioa

Egunero Ebanjelioa irakurri nahi duten lagunek, egun bakoitzari dagozkion irakurgaien arabera, hemen dauzkate erreferentzia guztiak:

1 Mt 9,1-8	8 Mt 10,7-15	15 Mt 11,28-30	22 Jn 20,1.11-18	29. Jn 11,19-27
2. Mt 9,9-13	9 Mt 10,16-23	16 Mt 12,1-8	23 Jn 15,1-8	30. Mt 13,54-58
3 Jn 20,24-29	10 Mt 10,24-33	17 Mt 12,14-21	24 Mt 13,24-30	31. Mt 14,1-12
4 Mk 6,1-6	11 Mk 6,7-13	18 Mk 6,30-34	25 Mt 20,20-28	
5 Mt 9,18-26	12. Mt 10,34-11,1	19 Mt 12,38-42	26. Mt 13,31-35	
6 Mt 9,32-38	13 Mt 11,20-24	20 Mt 12,46-50	27. Mt 13,36-43	
7 Mt 10,1-7	14 Mt 11,25-27	21 Mt 13,1-9	28. Mt 13,44-46	

Geure web gunea bisitatu

www.asissarea.org



Asis Sarea

646 21 48 96

Uztailleko otoitza
 hilaren 29ean izango da.